



Komunikadu Imprensa

29 Abril 2013

JSMP realiza treinamentu no fahe informasaun legál ba comunidade iha Suco Mulo Distritu Ainaro

Iha 25 Abril 2013, JSMP liu husi Unidade Peskizadór Jurídiku realiza atividade treinamentu no fahe informasaun legál ba iha comunidade iha Suco Mulo, Sub-Distritu Hatobelico, Distritu Ainaro. Treinamentu ne'e partisipa husi comunidade Suco Mulo rasik no Maubisse.

Partisipantes hamutuk na'in 30 ne'ebé kompostu husi mane 17 no feto 13. Partisipantes sira mai husi husi Suco Mulo representa husi Xefi Suco, Xefi Aldeia, representante Rede Feto Suco Mulo, joventude, no lia na'in sira. Entretantu husi Maubisse partisipa husi estudante universitariu, no media.

“Treinamentu ne'e hanesan atividade dahuluk husi treinamentu tuir mai ne'ebé sei realiza iha distritu seluk ho objetivu atu hasae koñesimentu comunidade sira kona-ba justisa ne'ebé la'o dau-dauk iha ita nia rai laran,” dehan Luis de Oliveira Sampaio, Diretór Ezekutivu JSMP.

Materia ne'ebé JSMP hato'ó iha treinamentu ida ne'e maka kona-ba “setór justisa inklui asuntu direitu ema nian, klasifikasaun kazu krime no sivíl, direitu arguidu no direitu vítima ne'ebé formula tiha ona iha manual asesu ba justisa JSMP nian. Manual ne'e mós fornese número kontaktu husi ONG sira ne'eb'e servisu hodi fo assistensia ba vítima.

Xefi Suco Mulo, Sr. José Florindo Andrade fo agradesementu ba JSMP ne'ebé bele hakat to iha nia suco hodi fahe informasaun kona-ba justisa. Atividade ne'e importante tebes tanbá comunidade iha Suco Mulo ladun iha asesu ba informasaun kona-ba justisa Timor Leste.

Iha parte seluk, Fransisco Magno nu'udar lia na'in ne'ebé partisipa iha treinamentu ne'e agradese ho inisiativa husi JSMP ne'ebé bele tama too iha área rurais too iha sira nia suco hodi fahe informasaun kona-ba justisa. Durante ne'e comunidade iha suco refere, sira la dun iha asesu ba lala'ok justisa iha rai laran, nia mos rekomenda ba JSMP atu kontinua fahe informasaun kona-ba justisa iha futuru iha sira nia suco.

Atu hetan informasaun kle'an liu tan favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Telefone: 3323883 |

www.jsmp.tl

info@jsmp.minihub.org